

四庫全書

集部

欽定四庫全書

集部

新安文獻志卷九十一  
上

詳校官中書臣孫衡

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣梁鳴岐

欽定四庫全書

新安文獻志卷九十一

明程敏政撰

行實世德

宋隴城令贈太常博士呂公士元墓誌銘

歐陽修

君諱士元字佐堯江寧人也

按宋史稱文仲歙州人羅鄂州志稱漆為文仲兄孫

今此誌乃以為江寧人蓋呂氏世仕南唐必有籍在江寧而歐公削去轉徙之由止書江寧以從簡也

咸

平二年舉明經為潭州醴陵尉廬州司理參軍寧州彭

原廣州四會縣令又為湖州司理泗州錄事參軍吉州  
泰和秦州隴城縣令以疾卒於官享年六十有五娶閻  
氏生子四人曰淵曰濤曰淙曰淇閻氏年七十三後君  
十五年以卒子淙後其母三月卒以慶歷八年十二月  
二十日以閻氏之喪合葬於揚州江都縣東興鄉馬坊  
村先塋之次君為人剛介有節長於為政醴陵泰和皆  
大邑民喜鬪訟往往因事中吏以法吏多不免而君日  
與長吏爭曲直下為邑民伺候終無毫髮過失可得而

民卒愛思之四會近海俗雜蠻夷君尤知其人之利害  
事經決後有欲輒更改者民必自言於廷曰此呂君所  
決豈可動耶後人亦莫能改也君仕三十餘年以一縣  
令之祿衣食其族四十餘口雖薄而必均夫人閻氏尤  
能為勤儉子淵漆皆舉進士漆有賢材以文學選中第  
一今淵為秘書丞漆著作郎直集賢院以漆官得封贈  
贈君太常博士母夫人封天長縣太君嗚呼呂君官雖  
卑惠於其民足以為政祿雖薄周於其族足以為仁身

雖不顯而有子以大其門足以彰為善之效君之皇祖  
諱裕贈兵部尚書皇考諱文膺官至太子左贊善大夫  
自宋興百年間呂姓之族五顯於世君之叔父刑部侍  
郎集賢院學士文仲實為先朝名臣而今君有賢子又  
將顯呂氏之族於後於其葬也是宜銘以誌其銘曰  
善無不報報不必同或在其後或及其躬積久發遲逾  
遠彌昌如其不信考此銘章

純孝篤行程君

立信

墓誌銘

蘇舜欽

有以純孝篤行著于吳里中者聞程君焉親疾齋戒蔬食以禱後因而不茹葷二十餘年幼喜酒病醒而母戒之自是終身不復飲既老得風痺之疾藥劑有以酒薦通行其力者家人白之君歎曰吾雖晚耄敢忘親言乎嗚呼食飲人欲之大君能因親而絕可謂純孝也歟里有駱生嘗以二寶帶密寄於君駱之死君即歸之其子不敢取又願分一以為遺君曰歟死受貨非吾所能為也族人離其貲產君悉不受惟收諸女之孤者鞠養之

長歸士人吳人好鮮食君獨戒殺又樂賑人艱急不問  
疏密凡鄉閭冠昏喪祭之法多取中焉君必隨其豐約  
而條處其事宴者或為資給之每觀書史必擇仁厚之  
言書於門牆以誦服焉卒之日鄉老皆為之泣下斯可  
謂之篤行也已君諱立信於慶歷七年月日終於家壽  
六十八曾祖新安人仕錢氏為營田使祖徙籍于蘇與  
父皆高遜不仕夫人劉氏淵靜有法則奉承尊璋接姻  
舊莊順之色夙夜不絕于顏內族人稱美之君之懿行



聞於人夫人有助焉爾慶歷四年郊祀推恩以君為大理評事夫人為彭城縣君用子封也夫人享年六十有五先於君百日而終三子長師愈次師旦次師孟太常博士知南康軍才敏有聞所歷著治狀一女嫁桐廬令樂某孫男女十七人以明年某月某日將合葬於蘇之某鄉太常君與予同年登科授狀丐文以識其窆銘曰

士大夫可罔以名鄉人不可欺以行誠久乃著宜享其盛不在其躬豈不有命壽弗夭閼嗣則淑令族尊理榮乃終有

慶刻文於寔後世所證

貴溪縣丞程君天民墓表

陸佃

尚書都官郎中程公諱迪有子曰天民字行可未冠舉  
進士中甲科後二年始應銓格進所撰詩書論以洪州司  
法參軍充相州州學教授遷瀛州防禦推官知衢州西安  
縣事充饒州州學教授丁外艱服除調信州貴溪縣丞以  
疾卒於智亭實元豐九年正月十三日也享年三十二  
葬以八月二十四日墓在其鄉三衢雲臺大澳之原君幼

則聰敏不好兒弄日誦數千言成童屬文操紙立就及出仕宦恂恂一年少爾然為學官有師法為縣有史治熙寧中予暨行可嘗試開封進士是時神考相王文公作成治法初以經術進士其被命考校者至數十人極一時之選予於其間愛行可受才俊邁而造行粹良竊謂異時當為國器即今雖未備成蓋詩所謂金玉其相者也傳曰金錫鍊而精琮璧性有質此衛武公得數九十有五更事閱理既老而益精故詩人歌之道盛德至善民之不能忘也嗟

乎行可雖受道之質可謂美矣然閱世未久不幸短命以死誠使黃髮兒齒台背如古之人其所至豈易量哉有文集若干卷亦可以觀其志矣夫人尚書左丞鄧公諱潤甫之女生男曰俱今為假承務郎女二人適太廟齋郎樓彥升婺州東陽縣主簿朱邦俱能自樹立甚似吾行可其續大前人之光將在於此故樂為之道使歸而揭石焉

右朝散郎致仕王君

公權墓誌銘

汪藻

建炎元年朝請大夫秘閣修撰王愈以書走廣陵屬其  
邑人汪某曰愈不天不能事親先人棄諸孤將以明年  
某月某甲子葬德興縣靈湖之天塘惟先人束髮讀書  
立訓故為後學宗抱能不施以不大振耀惟不肖孤材  
下不能嗣事使其名聲顯聞今既返九原若不別藏懼  
日遠日忘終泯泯無詔惟夫子賜之銘以寵綏其歿假  
王氏無窮之休敢請某曰噫是吾邑老成望其貌如東  
郭順子聽其言如仲長公理叩其學如皇甫士安者也

銘其可辭君諱某字公權其先瑯琊王氏晉渡江居江南訖唐有人廣明之亂有徙名數于婺源者於君為九世祖以力田遺子孫至君大父始釋耒為儒家君兒時穎甚得書敏視若流遊太學藉藉諸生間以父老丐歸從鄉舉州再上其名再不中父喪既除即慨然有高世意或勉之仕泣曰吾所為汲汲者以親在也今親逝矣奚仕為廼杜門息交著書數萬言言覈而理申要必自已出不借他人一詞愈用君學擢紹聖元年進士丙科

調建昌令時江南游饑縣無儲獨經廩厚藏吏守文不敢發君亟以書抵愈曰令活民而黜職也愈稟行之由是建昌之邑居數千里流殍間不知其無歲已而愈守信會賊方臘寇城危甚君索橐中得白金數千兩間道資愈餉軍且戒之死聞者無不感奮以故兵焚殘十餘州惟信屹然無秋毫之失蓋君明於事機以成其子者類如此建中靖國初以進士久次得官不赴用愈思累官朝散郎賜五品服以某年某月某甲子卒於家春秋

八十有三曾祖某祖某父某妻余氏封安人先公卒二  
男子其一愈也次曰慎孫六人德昭迪功郎餘尚幼而  
德昭前卒君居鄉博施兼容歲折券以為常而與人未  
嘗校於治心養性皆得其要蓋不讀釋老之書而闇與  
之合古所謂耄期稱道者如君非邪銘曰

晉之王姓兩族蕃至唐獨有瑯琊孫公家江南乃其昆  
以學自表為清門著書上與千古論材雖不施聞則尊  
遣子出仕乘朱轡葉膏旣沃還流根莫年章紱榮詔恩



奄蛻壽骨歸丘原靈湖有阜如鵠騫君手自毫氈非承言  
我書其實要不煩刻著玄石期長存

朝散郎致仕胡君咸墓誌銘 汪藻

大江之東以郡名者十而士之慕學新安為最新安之  
屬以縣名者六而邑小士多績溪為最績溪之民以族  
名者無慮百餘而學傳子孫胡氏為最胡氏有隱君子  
曰誠甫其書滿家仰承俯授皆有師法又其族之尤者  
也君諱咸字誠甫曾祖嶠祖筠皆樂里居不求仕至父

策始起家為鉛山尉誨其子必千里求師長宏登進士  
科仕至處州司法參軍君其次也君少刻意於學自六  
經司馬遷班固范曄陳壽史書皆手鈔成誦會熙寧元豐  
間朝廷以經術新天下人材學者宗王氏君於諸經自得  
其指歸而尤邃於易游太學十餘年率杖策往還其精如  
此方是時士集京師歲以千計君穎然出其間為之領  
袖一旦如有不樂者謝病歸召諸子出其書授之不數  
年其子舜陟舜舉踵相躡取高第而舜陟遂登法從典

大州隱然為天子名臣君饗其祿幾二十年自承事郎累官至朝散郎舜陟又以所當得之服授君賜緋衣銀魚績溪固多士如君父子得名稱章紱而歸者無幾而公又慈祥豈弟有以宜之長老稱焉方舜陟之為御史也屢擊大臣欲寘之死而君不以為憂及守合肥盜環其疆禽制有功州人懷之為肖像以祠而君不以為喜蓋君之得於中者又如此建炎四年八月辛亥以疾終於家春秋八十有一娶閔氏封安人前君卒四男子曰

舜陟朝請大夫充徽猷閣待制曰舜俞曰舜申皆疑然  
有立曰舜舉迪功郎二女子適士人葉文仲鄭邦彥五  
孫曰偁仔傳俊其一尚幼而仔亦迪功郎諸孤將以紹  
興元年五月丁未奉公葬於湖州安吉縣管城原來求  
銘納之壙中某與君世姻知君非一日者宜銘以詔後  
銘曰

君之德純明諒直懿鄉而隆威修身以亟動而有則為  
國人之式君之學得之先覺聞尊而見卓不瑀其璞遺

其子琢有連城之鼓君之榮世以儒名道傳而志行有  
子在廷吾亦影纓饗耄期之齡卞山之陽維水泱泱雖  
非其鄉與其相望子孫家傍為萬世之藏

先公觀察奉議穀行狀

汪藻

公諱穀字次元姓汪氏汪氏軒轅皆古國名春秋時童  
子跖以功顯魯孔子韙之中間譜系不傳至五季有自  
歙之黃墩徙婺源還珠者於公為九世祖子孫因家焉  
用高貲為江左著姓至公之父子始以進士繼踵起家

知名一時如文正范公韓康公王文公雅相知友年位皆不滿其德措紳悼歎公皇祐五年及第初任撫州宜黃縣尉少年明銳遇事莫為持難盜殺里中民胥憚於捕鞠則為虎傷以聞公一見輒窮其偽曰凡獸食人不容偏齧今則如此謂之虎傷何哉胥不意情得即叩頭吐實一邑以為神移泰州泰興縣令會中遣御史按水災他邑長以裁減民賦不均訴者紛然及被詰莫知所為獨泰興有經式公私交便御史以公為能喜甚召與語

大奇之坐公堂上庭折諸邑長指泰興為法當是時汪泰興名聞淮東公進曰此未足為御史言也縣瀕江民依沙為田出租賦歲久沙潰民抱虛責閱數十吏無告害莫大此願益得為民除去於是奏可蠲復者亡算訖今泰人誦之丁外內艱以長孫承祖母萬年君憂改建康軍節度推官知漢陽軍漢陽潤州金壇縣泉州晉江縣丞元豐初縣官立法期會旁午晉江雅多權右前為丞者熟視彊梗莫敢治以故結納常殿公至則繫執政家

吏一人曰咎當歸我不諉他人也調太平州軍事推官  
廬州觀察推官部使者怒旁郡守謀以危法中傷鞠者  
莫敢直直者輒以罪去最後諷公公曰禍人自免豈吾  
心耶攷正于理不為屈使者大怒亟劾公益不能奪則  
以獄上刑部至刑部則以公言為當乃已聞者壯之有  
新貴人如京師厚徵從兵之食者衆多附之公曰國家  
之著功令也曰結糧如所結之秩否則有刑費則有償  
今日汝何令之有惟吾之所從欲他日刑吏而償之無



乃不可乎且何必剝賤而媚貴不聽後果及于敗皆以  
公為知言初公為泰興以材敏稱至薦者一日倍當遷  
之數人謂公且顯矣亡何憂患十年僅得一幕吏漢陽  
以縣省去官金壇以避仇稱病免官當公之免也法以  
暮叙而遽踵新令告滿二年其為幕吏法當減舉將之  
半而又以坐免沮格居晉江日有哀公者驟薦於朝皆  
為公慶會盜起閩中按察者多得罪復報聞罷嗚呼可  
謂窮矣公亦自以直道孤立知者不為無人然動輒跋

橐若陰有祝之者廼益退縮不為表襮欲為地者皆推而不受一旦棄官老於故居龍溪之上治田桑保墳墓客至即醺酒擊鮮劇談計日為溫厚長者無纖介隱衷然於親疏曲有禮意各得其歡心雖面刺人過而受者更以為喜與人說理道成敗反覆曰後當如是初若闊疏事驗皆信服間則繙詩書鉛槧不釋手凡經抄錄者無不精審歲時書問無貴賤必親治惟謹未嘗教子弟占答故辭翰可師人皆藏之以為珍有詩百篇意深語

典因事立誠要不虛發而不以示人其隱德如此家居  
十有二年以致仕恩轉通直郎以覃恩轉奉議郎賜五  
品服蓋晚而子孫取科第仍祖孫五世基緒不絕人方  
以鮮儷為榮而公卒矣享年八十實崇寧乙酉六月某  
甲子也曾祖某故不仕祖某任司封員外郎贈光祿少  
卿父某任都官員外郎以公故贈中散大夫妻開封陳  
氏永嘉縣君繼室以其弟壽光縣君男六人槃槃槩棠  
藻彙棠先公卒藻從事郎宣州州學教授公清慎剛介

出於天資終始完節不以勢利豪髮汙撓質之神明無愧也乞身彊健時優游自得常曰吾先世以才短年今奇拙而壽足矣其退居龍溪家日益貧或以賄怵公者曰吾寧貧忍為此耶官閩日僧居歲熟荔支自守貳而下皆餽焉無慮萬計公曰是泰吏也夫獨斥還之後有坐是而黜者人方服公之廉王文公於公為父執方用事汲汲於人物諸附離者多貴有勸公以異時所得尺牘為獻者公笑而不答雖緣吏事一再造請諄諄道舊

故而卒無一語及私建昌李公常治湖公以故人子往  
依焉常屢以美官勉公公不屑也渤海張公擇賓南劍  
陳公偁一見公於稠人即嗟重論薦公曰不緣介紹而  
能然真知我者也錄其諱日歲蔬食以報之公尤善攝  
生至老精神容貌不少衰時與壯者角膂力起步為笑  
樂往往多不及常誦佛書願脫疾苦方與親串命酒如  
平時神識不謬俄側身而逝衆以為獲報諸孤期以某  
月某日奉公葬於龍溪源冕木塢永嘉夫人相焉從公

卜也謹錄公行事如此以待立言者圖不朽焉謹狀

記外大父祝公確遺事

朱熹

外家新安祝氏世以賢力順善聞於鄉州其邸肆生業  
幾有郡城之半因號半州祝家有諱景先者號二翁尤  
長者元祐黃太史嘗贊其畫像廣幅全身大書百許字  
詞甚瑰瑋經亂而逸熹少時見外大父猶能頗誦其語  
至諸舅則皆已不復記憶矣二翁諸子皆讀書外大父  
其第二子也諱確字永叔特淳厚孝謹少時聞父母將

為謀婚逃避累日家人驚索得之猶涕泣不能已問其  
故則曰審爾則將不得與父母昆弟早夜相親矣親喪  
廬墓下手植名木以千數率誦佛書若干過乃植一本  
日有常課比終制而歸則所植鬱然成蔭矣一兄一弟  
先後死熙河皆親往致其喪往返徒步不啻萬里所舍  
輒悲號上食如禮夜寢柩旁不忍跬步離去路人皆為  
嘆息諸弟求析其產公為涕泣曉譬不能奪時四妹猶  
未行而諸弟得財皆散去不復顧公獨罄已貲以遣之

其一歸同郡汪公勃汪公後登二府終身德公不能忘  
人兩賢之歲大疫親舊有盡室病卧者人莫敢闖其門  
公每清旦輒携粥藥遍造飲食之而後反日以為常其  
他濟人利物之事不勝計雖傾貲竭力無吝色鄉人高  
其行學試又多占上列郡博士請錄其學事時三舍法  
行士子無不由庠序以進公從容其間若無所為而後  
生得所矜式咸敬服焉熹先君子於時亦為諸生年甚  
少未為人所知公獨器重以女歸之後卒以文章致大



名世乃以公為知人方臘之亂郡城為墟鄉人有媚事  
權貴者挾墨勅徙州治北門外以便其私而所徙窳下  
潦漲輒平地數尺衆皆不以為便將列其事以訴諸朝  
者餘二千人而莫敢為之首公奮然以身任之其人忿  
疾復取特旨坐公以違御筆之罪公為變姓名崎嶇逃  
遁猶下諸路迹捕不置如是累年時事變更羣小破散  
然後得免而州治亦還故處鄉人至今賴之而公之家  
貲事力不能復如往時矣然終不以為悔也比其晚歲

生理益落而好施不少衰年八十三以終娶同郡喻氏  
亦有賢行生二男一女伯舅萃娶張氏其先以治獄有  
陰功王宣徽拱辰所傳張佛子者也次即先夫人德性  
特似公其行事自見於家傳叔舅嶠少敏悟有文長從  
先君子遊聞伊洛之風而悅之然求舉輒不利喻夫人  
及伯舅既先卒叔舅後公十餘年亦即世今惟伯舅之  
子康國居建之崇安叔舅之孫回居劔之尤溪而康國  
二子已總髮能誦書矣熹惟外大父之淳德高行先人

後已其誠心所格固宜有後而康國母家所積之遠又如是天之報施其將在於此乎竊感陶公作孟府君傳及近世眉山蘇公亦記程公遺事不勝凱風寒泉之思因書此以遺康國使藏於家時出而訓習之厲其子孫又記嘗聞先夫人說第四外叔祖豪俠不羈蚤從黃太史遊黃公謫黔中因以客從黃公賢之為更名林宗而字之曰有道與之諷詠書札甚多今皆不存獨所為書柳如京皇考志世或傳其墨本姓字尚可見耳先夫人

及叔舅少時猶及見其道說黃公言行甚詳酒酣悲歌感慨悽切絕不類世俗音調問其所以則曰黃公之遺

聲也此事外家兄弟亦少聞者因附記於此云

熹既序此事將

書以遺濟之弟未果而濟之復以疾不起其二子丙癸相從于建陽因書畧之俯仰今昔為之流涕不能已慶元戊午臘月既望書。呂左史午跋祝氏世居江陵自承俊遷于欽曰仁質號半州其子也孫象器改名用之登儒科為太學博士六世有名筠預鄉薦學富而文瞻至和甫七世矣和甫名穆即丙也其諸父皆依朱文公遂為建人和甫幼孤父公教育於家塾年甫志學命文肅黃公幹為行冠禮蓋及親炙當時講論之益故其氣象粹溫刻意問學於書無所不讀下筆頃刻數千百言將以儒業昌其家所謂光遠而自他有耀者也祝氏復

興其在建乎始太博有弟景先即黃太史贊其畫像者  
生男若女十有四人其第四女實為黔邑樞密汪公勃  
之夫人又其第三子砮之女復歸樞密子提刑公作礪  
而侍御公義和寺丞公義榮給事公義端皆其所生也  
第二子確之女適婺邑吏部朱公松是為文公之母故  
鄉人相傳祝氏女位最高有名堯臣為郡學諭者景先  
第八子砮之子也男女四人嘗奇第三女不肯與凡子  
未及嫁而學諭公卒親族咸以屬同邑呂午兩窮相值  
遂成姻對越七年而午偶忝末科由是祝氏女位最高  
之語復喧傳于鄉閭貳卿汪公綱之兄弟與貳卿朱公  
在尤為祝氏喜所以篤叙甚至嘗聞外舅姓來朱汪之  
門文公與侍御諸公皆重渭陽之念深加敬愛此意流  
傳歷世不泯而且施及於午焉乃知前輩高情曲宗親  
誼遺風凜凜可尚矣一日和甫示午以文公所記外大  
父遺事三復感歎謹百拜書其  
後時紹定六年五月旦日也

滕君希尹墓誌銘

朱熹

君姓滕氏諱洙字希尹世家徽之婺源蓋莫詳其始所  
自來中間有見故翰林學士達道者扣之乃知與東陽  
之族同源而亦不能言其遷徙合散之所由也君曾祖  
谷祖為父恂皆不仕而叔父愷蚤以文學論議有聞於  
時起進士官信之戶掾以卒士友惜之君幼聞家學緒  
餘長從鄉先生俞君宋祐及一二知名士遊並務記覽  
其蓄甚富為舉子文亦精緻有程度而數以不偶即棄

去不復為獨教諸子為學而不專為場屋計平居厲以  
篤志力行之訓甚悉及二子登科從仕則又時時為道  
平日閭里間所聞見情偽失得之變以開曉風切之以  
故二子皆以能自樹立有聲州縣間晚得末疾猶手抄  
孔孟言仁梗槩一編日夕玩誦而又大書躬自厚而薄  
責於人之語於壁以自警其好學檢身雖老不倦如此  
病革却醫藥手書死生有命富貴在天兩言以示諸子  
而卒紹熙四年七月二十七日也年六十有五夫人胡氏

有賢行前君一年卒五男子璘從政郎鄂州州學教授  
珙迪功郎寧國府旌德縣主簿瓘瑄皆業進士琇前卒  
二女嫁進士程萬頃程頤之孫男七女四君為人恭儉  
質實遇人無少長俛首接語如見大賓凡世所謂少年  
豪習饒樂放縱事未嘗一接於身自奉甚薄終身如一  
日不以豐約易其度居家事親誠心孝愛委巷之禮薄  
俗之態雖欲強之不忍為也兩逢慶壽恩或勸增年以  
應格君不可或問之則曰欺君而受爵亦何榮之有哉



有士族女未甦落倡家君謀贖之倡僧知君貧立偽券  
高其直以難之君未有以為策也會璘預薦書郡致金  
錢若干為勸駕禮盡以予倡得女嫁之不復詰其偽縣  
宰張安中賢之為書牒以表焉君之為人大抵如此嗚  
呼是亦可謂善人君子矣然其志與材既不得少自見  
於當世其壽命又不得究於高年獨諸子既能順承其  
志而又將有以顯揚之則人或以是為天之報施果不  
繆也璘等將以明年五月二十四日合葬君夫人於萬

安鄉龍陂四壯之原使珙奉吉州錄事參軍程君洵之狀以來請銘予以疾病久衰謝不能而珙請益堅予竊哀之乃為次其事而銘之銘曰

行之躬學之力積之豐施之嗇謂天夢夢請視斯刻

程君公才汝能墓表

朱熹

紹熙二年冬番易程君正思病且革以書抵予告訣且書其先大父府君之行事而求識其墓予既哀正思之力學任道而不幸蚤死又知其大父之賢如此而無所

聞於後世矧其將死深悲之屬不在他人是固不可以  
無言也按正思言府君諱汝能字公才天資純篤不由  
學問而孝弟忠信自有以絕人者父性嚴府君事之順  
焉於其行事有未安者必以正諫諫而不入則退而謹  
伺之意解復諫卒聽從乃已母得末疾三年衣不解帶  
居不入室時其起居飲食之節而躬致養焉雖矢溲之  
後不以累他人也事兄謹甚兄好飲佚遊府君懼顯兄  
過以貽親憂委曲其間彌縫甚至卒以無間言親沒析

其產兄欲善田宅恣所取無難色平生口無惡言妄語足跡不涉官府之門居鄉接物恂恂謹飭不怒而人敬畏之周人之急必盡其力雖或負之不計也鄉人有死而無子者治其喪甚飭或欲沒入其貲產為告官立後至今不絕家慈愛而能嚴子弟不敢為纖芥非理事今沒三十年鄉人行旅言之猶有思慕出涕者嗚呼茲非夫子所謂十室之邑忠信如己者乎是乃三代之遺民而非今世之士所能及也使其得聞聖賢之教而講

學以明之其所至可量哉正思病亟作書其詳如此而  
字畫謹細如常時且謂他行之懿猶有不及書者今問  
其家得其世系則審易之程皆祖梁忠壯公靈洗乾符  
間有名維者以金紫光祿大夫海州鹽鐵使將兵討巢  
賊不利始居饒州樂平之銀城後徙新建而地析為德  
興縣故今為德興人自鹽鐵十二世而生府君之父諱  
宏亦有鄉行娶齊氏生府君府君娶某氏生二子曰晟  
曰易晟先卒易今以修職郎致其事而又有正思為之

子意者程氏其將興乎今正思雖不幸而二弟亦知為學是固未可知也乃書此刻石墓左以俟墓在某鄉某里某處晟之子曰端友曰伯雲易之子曰端誠曰端蒙曰端臨曰端本正思即端蒙也予亦已別識其墓云

紹熙三年秋九月丙子朱熹書

右朝散大夫汪君叔教墓表 曾 幾

有宋建炎四年庚戌右朝散大夫汪君寢疾沒于私第紹興二十七年丁丑子將作監丞暨秘書丞上書闕下

言臣父棄養時諸孤尚幼且賤葬故有闕而宅兆未吉  
乞歸改葬詞甚懇切天子憐其志賜告歸因命歛之佳  
山聽自擇襄事已而公子之直恩至渥也秘監以書投  
予曰先君之行胡待制嘗誌之矣未有表其墓者願干  
大手筆某與秘監辱好同朝因執其咎大夫君諱叔敖  
字子游歛之唐模人自越國忠顯錫命之後世為歛著  
姓曾祖承吉祖士明父霓皆隱德弗仕伯兄叔詹以文  
行官奉常遷司農少卿故霓公得以子貴大夫君公第

六子也最晚出父母鍾愛之朝夕不離其側然未嘗恣其口腹之欲仁義忠信之訓諄諄也大夫君天性穎敏親言輒記不忘甫髫髻見事確如老成雖賦於天者特異而義方之益居多年少長知好古樂道慷慨有大節諸兄自謂弗及也尤克盡弟道所獲皆推讓之大得諸兄心既冠娶洪氏同邑承允君女仁而能賢以婦道自力閨門宜之寃公春秋甚高大夫君喜不勝懼無何父母相繼而終哀毀骨立既除喪諸兄議析居家之所有



悉置不問田廬獨取瘠者及收詩書而已後方臘寇歟  
避地濡須大夫君以筆耕而夫人傾筐以濟之頗給衣  
食然澹泊是甘貧窶未嘗動心也比返室廬蕩然諸兄  
欲分給固拒不受曰非其道義伊尹一介不以取予矧  
兄所有而取之與紆臂而奪之食者殆有甚焉兄輩莫  
能強宣和五年徙居潛川之東不一里許時監丞纔十  
齡受誨大夫君篤學如成人鄉達或忘年而與之交既  
冠授徒四方來者甚衆司農公目曰吾家文舉始大夫

君自二親之歿每春雨秋露哀傷靡任久之成疾累藥弗瘳建炎二年冬遂伏枕以俟命四年捐館時監丞甫冠餘尚幼不任事家且窘僅能薄葬已而諸子相繼登第顯榮於朝則其力請而歸舍舊而新是圖從厚道得吉地焉禮也大夫君有子四人長若容將作監丞大夫追贈以之次若泉官承務郎次若虛不仕次若思今秘書丞嗚呼若大夫君者可謂為善於生前食報於身後者矣其事親也孝隆焉其處諸兄也弟至焉其教諸子

也愛周焉宜其有蚌珠之貴章命之榮墓地之錫此福  
善之明驗也余特表大夫君之事非直以彰厥美亦欲

勸後來者之為善云

欽黃羅峯之北麓曰金紫院山水秀  
環竹松蔚勝為歎諸利之冠有吾汪

大夫祠其間蓋宋紹興二十七年將作監丞公若容秘  
書丞公若思伯仲營度也二公聯仕高宗朝歷官奎府  
凡政術奏疏動愜旨意上甚寵遇之因其父叔教公先  
逝贈至奉直大夫母夫人洪氏亦屢被恩顯後考終二  
公奏乞歸葬上勅歎名山宜從安厝遵葬大夫公於杏  
城夫人於黃羅追封至金紫官秩榮錫之至也秘監公  
暨其仲氏若虛輩欲本先廟制立祠以奉常祀使世著  
朝廷寵洽之恩迺買地於夫人墟墓東拓基度材中建  
梵宇宗會棲其左像大夫祠其右重門修廡以及燕享  
栖釋之處靡不秩然其壯觀焉既事奏之朝賜被今額

召僧焚典置田以畀之俾供泛費餘以給其食復乞省剝  
為加護錫石以永其傳嗚呼二公其善揚先德者哉由宋  
歷今百五十餘載樓宇浸復圯壞而祭田又多為隣院  
氏有之事殊乖昔院僧某欲募某氏立鍾樓有奉二姓神  
主使給其處之意秘監公裔孫縣尹壽甫輩僉謂祠堂  
祖宗開業傳世之本況金紫院惟先君子有功德于朝  
廷寵賜恩典苟胥為人有是蔑先朝而棄宗祖之地矣  
其何以嗣世而立乎戴履間哉遂率同宗輩經之營之  
曾不踰三月而昔之圯且壞者以次修舉光明瑰麗一  
復舊觀使其先世之烈赫然復振而釋氏相紹之意於  
是乎息矣報本反始之義壽甫蓋少慰焉延祐己未冬  
予官岳州道歛而往會壽甫託文詳其事於石按家譜  
予先世亦自歛遷娶歷八世而家宣城則於秘監公蓋  
族子也故述其興修之由以為記俾後觀者知壽甫克  
繼克嗣有補於後先爾若宗會之設祭饗之宜有宋樞  
密劉公珙記在予復何喙云禮部尚書宣城宗人澤民

記

程宣義放墓誌銘

呂 午

宣義諱放字季嘉姓程氏自號拙菴程氏系出伯休父  
魏有昱吳有普皆以勲勞聞晉元譚守新安有功德於  
民詔賜田宅於歙因家焉至陳靈洗以平侯景功侑食  
武帝子孫散居海寧黟歙間世有顯人曾祖遷祖大圭  
皆潛德不耀考正橫經鄉校輩行推服子六人長宣義  
也自幼如成人率諸弟力學執親喪哀毀特甚時祀務

極嚴潔諸弟淪謝撫卹其孤備至與人交和而有禮生  
產素薄不妄取侈費而喜周人之急鄉評歸重配安人  
吳氏同邑溪南望族溫淑勤儉事舅姑以孝佐君子以  
順睦嫻族惠臧獲無不得其心子男二人元定元鳳皆  
安人所出也始宣義博學強記工詞賦結字有法度雜  
諸于湖張氏無辨也一時意氣視功名可指日取再詣  
賢關輒不利以命義自安惟篤一經之教歲在戊子元  
定魁次榜元鳳亞鄉書明年又亞禮闈已而元定一疾

弗起宣義能以理自寬明年元鳳迎侍赴江陵教官處  
官舍如家居晨興盥櫛課諸孫學業甲午還里中丙申  
元鳳迎侍赴江西漕幕在豫章如在江陵既壽且康人  
皆健美己亥言歸安人病舟至景德鎮竟不救享年八  
十有三方其未病也嘗夢往遊于禮莊之原及歸卜地  
於斯果吉遂以庚子十二月十七日奉匱窆焉辛丑元  
鳳服闋授禮部架閣壬寅歸省欲就迎侍居無何元鳳  
除國子錄改京秩抵京至有喜色賓朋奉賀將迎不倦

忽一夕寢疾翼日而逝享年七十有八嗚呼夫婦俱以  
壽終而其後且將昌熾未艾天之福善豈不信耶女三  
人長適劉元佐次適吳潛次適汪應耕皆業進士孫男  
四人彭祖榮祖宏祖象祖孫女二人長許嫁朱氏次未  
笄初為安人營兆域宣義命虛其左俟合葬至是元鳳  
從治命將以癸卯六月二十八日祇奉襄事前期屬其  
堂兄太學進士元迪叙次宣義安人平生行實來乞銘  
午與宣義居相近又與國錄以詩經相先後取科第契



分益厚當宣義過豫章時午適奉老母扶護先大夫歸  
葬獲迎拜於巖溪沉厚寡言典型前輩深切敬慕且念  
其于飛往就榮養不勝我心陟岵之悲飄忽七年間午  
猶幸將母竊祿而安人與宣義相繼下世矣限以職守  
無由躬致生芻之敬則其於銘何可辭銘曰

夫夫婦婦教隆義方禮闡擢桂一枝獨芳安車雕軒迎  
養其慶千將莫邪佳城同藏勒銘于石昭示無疆

友仁先生許公大寧壙記  
許月卿

許氏姜姓也先君諱大寧字寧之徽州婺源許昌人故  
簽書樞密院事鶴山先生魏文靖公嘗友其仁曰天下  
仁人也以小篆匾其堂曰友仁對客稱為友仁先生曾  
祖考諱良故尚書工部侍郎秀岩先生李公題墓道云  
有宋善士祖考諱安國參知政事鳳山先生李公署以  
淡軒居士墓道考諱琳故左丞相克齋先生游靖獻公  
以長者書墓道之顏先君生而秀穎孝友異常兒左右  
就養四親異之十年哭淡軒誠哀如成人厥九年喪長

者於是大母張母胡兩世隻影癯於雙鶴先君哀盡然  
有以得兩母心生其死二昆曰吾有弟矣張夫人沒十  
有五年而胡夫人即世先君哭之若喪長者而哀曰予  
為童子時筆墨洗空畦徑諸老先生摩其頂曰希有希  
有朝廷方以進士科取人予傲兀其間歸而讀有司所  
可者皆予始所為後改之者也念吾母欲進士予為之  
又三年矣今吾終不復有母又奚暇進士哉蓋自是不  
應舉先君和平溫厚視人猶已過人不欲人譽已濟人

不欲人德已性於天世於家其用力於求仁深矣有過  
糴者先君為之誦西銘曰謁糴者豈獲已哉挾金不多  
人往往厭其煩餓者由是衆必多金然後得糴得糴者  
滋寡殍死者山積安乎先君手權衡背汗滂若無秋毫  
厭射意糴未徧家人云食終不食曰一人糴其家待而  
食者且十人饑吾一人以食之胡不可人私其私以隣  
為壑先君不間遠近一之以西銘歲覈戶若干口人予  
之粟曰糴者西銘理一予者西銘分殊也藥其病棺衾

其死泉幣其窮無告者不必族姻然不幸麗桁楊即衣  
續之達徑闢之石之川不梁造舟而梁之衣冠佩玉不  
動聲容而悍者神伏狡者心化有不善萌焉畏先君知  
不敢為者甚多訟不即有司而之先君之廬得片言皆  
失其所以爭而去常曰松柏之下其草不殖為富不仁  
者未嘗學問爾故先君之鄉貧富皆得所安急人之急  
雖犯大寒暑當大患難得疾疢致空乏為世非笑了不  
顧二昆既逝卹孤扶危有人所甚難者平生祭必敬祭

已必哀事尊者必盡禮遇少賤必降屈犯之不校清之  
不濁性有常度終身如一日家傳紫陽夫子之學學者  
問疑及解輻輳見其進則喜如己子異時病中讀韓退  
之文杜子美蘇子瞻詩終身不遺忘曰吾病未嘗無所  
得晚讀黃魯直詩而說之故暮年詩體一變月卿初能  
言抱而教之曰段秀實笏擊朱泚顏杲卿而折祿山簡  
冊有光精爽如在惟爾英烈追配古人此高宗皇帝追  
賁李公若水訓詞也小子識之淳祐四年月卿幸賜對

因憂勤逸樂之間極陳時宰以逸樂二字為竊權之本  
考官懼第為五甲有旨陞第四先君喜曰真吾子也月  
卿兩仕危邊人笑其左先君曰吾教之爾好賓客無日  
不投轄築羣書樓愛蓮閣一觴一詠至者忘歸客方貴  
盛禮不為加其落陷穽悉力拯之不倦盤錯游刃而沈  
靜如愚使用于世才德之傑也生於紹熙四年十一月  
二十日癸未沒于淳祐九年七月七日丙子得年僅五  
十有七神明不亂笑語而終知與不知皆為流涕更相

唁曰世復有仁人如是乎有雙桂堂藁若干卷先君為善不斷人知其誦言曰陰德如耳鳴人知之者豈陰德耶娶李氏子男月卿承直郎前差充淮南西路安撫司准備差遣協卿後仲氏日卿時卿業進士女適俞有大張沂李未行嫁孫男允茂允薰允莊允英允芳允葵女五人十有二年冬十有一月甲辰葬北珠潭之上孤月卿泣血記門生國學上舍正奏名李夢科填諱

新安文獻志卷九十一



欽定四庫全書

新安文獻志卷九十二上 明 程敏政 撰

行實

世德

場圃處士吳公

豫

墓誌銘

方回

孔門曾氏自荀鉉瑟言志與三子異說參生元元生西  
猶羞比管仲吾鄉友堂先生吳氏從朱文公游世傳其  
學高風似之元祐中大梁王立之以詩鳴其父才元舍  
人高貲園野甲一時能致蘇黃及晁張諸文人陳無已

晚為賦頃有亭者立之遂為江西宗派之一友堂之孫  
曰處士場圃公公之子曰古梅郡博士見與名勝又似  
之回生後公獲與博士為詩友日幸解郡休官將從是  
家賢父子搜玉色舊香之句以想像零泝之詠音而前  
進士紫陽山長曹君涇馳介以狀來則公已厭世而僊  
矣顧晚後何敢銘長者然平生讀文公書見集中稱友  
堂為吳叔夏如滕德粹德章程允夫必求其後納交而  
癖習耽吟與博士好亦不啻如無已之於立之是銘也

其庸辭按狀公諱豫字正甫宋嘉定二年己巳二月二十有二日雷乃發聲而生祖友堂喜以坤下震上之卦名之公先居姑蘇十世祖徙歙於今為徽州其季徙宣城者為履齋丞相潛家六世祖曰用清以財雄五世祖曰福產益殖門益大曰元禮為公高祖曰作德為公曾祖業儒有聲是生友堂友堂之從兄曰映登淳熙二年進士第皆福之子元珍元珪孫也友堂之從子曰佐王曰德成曰景仁接踵儒科凡五人學施有政而友堂諱

昶獨終身守其師文公之說意薄進取文公歸婺源率  
先執經至禁偽學徒走寒泉精舍不懼與存齋鄂州狷  
庵郢州二羅公願頤內翰野處洪公邁尚書文簡程公  
大昌文字友文簡著雍錄禹貢圖演繁露等十餘書多  
賴折衷晚以所輯書說史評等授其子諱儀即公之考  
也公曾祖妣黃氏祖妣胡氏而先太夫人亦胡氏如曹  
大家通貫經史甫冠失怙嘔血彌年世父學行先生錡  
入上庠為前序文行高古奉母命就正焉及母喪號慕

骨立歲時薦饗家廟神主祭器制度如古禮壹守學行  
規訓遠逮白首言及二親猶泣下當壯歲別業失泉數  
鉅萬久乃知為里中子矐亡移舟左右欲執以詣有司  
公恐敗其名竟絕口不復道東阡西陌故人出服休采  
傳經訂律治賦行軍疑丞岳牧往往而有以世路之未  
夷也形役其心尻高其首危刑辟之陷弄泓讒謗之風  
濤亦豈少哉公曰如以古鄉三物賓興者我亦往矣我  
讀書不求甚解訓詁章句聲病帖括非我所謂學也小

得者鉅喪先笑者後號有一人有衆人非心悅不誠服  
有今世有來世非事久不論定倡義役也敗名利已者  
側目惡淫覲也鬼道誣民者折角是是非非於直枉而  
面折人過也間有經瀆詆瀾椎埋悍酗者初亦不便綿  
時歷歲以觀諸天從降命逆降威然後翕然胥化中年  
諸子英妙秀發而博士大篇短章儒林丈人行見之驚  
屈吏部秋崖方公岳眇視四海端明後村劉公克莊六  
十年專詩鉞其賞拔如坡於唐子西谷於高子勉也公

謂肯友堂之堂其在子矣取幽七月之詩於禾稼間築  
場圃以自老倣陶弘景為層樓以娛賓客丞相訥齋程  
公元鳳為書其扁曰與汗漫期為堂曰延芳儲書餘萬  
卷圖畫稱是許比閭俊彥觀摩麗習於茲博士又為堂  
曰躋壽以為將徹與問之地然處常易處非常難商之  
孫子其麗不億侯服于周裸將于京彼山頭望廷尉之  
徒乘隙束縕以焚巨室何廷尉望山頭人傲賄詭禦暴  
公弗聽衆指目主名實負恩反噬者請治公弗忍挈燼

餘之南山之南幸場圃猶歸然則葺籬落葺牆壁益穿池種樹作米家書畫船雖向之籤軸不具而官寓叩門無虛日惟飲少輒醉好客不衰博士起布衣典鄉校踰四年以文公之道友堂之學復長臨容公聞而歌曰養頤之龜芸人則那我有場圃歲晚如之何博士勇徹臯比日侍膝下歲辛巳季夏日己巳曾孫生生之日公之年家人以白大喜名之曰桐老蓋取鄭小同之義而以其支干所屬婉以木焉博士亦喜弄孫方治具延湯餅



客為公壽而明日疾作踰月以至元十八年七月八日  
卒年七十三公娶胡氏張氏汪氏皆先公卒張之大父  
曰贊太學內舍水南望族男三人皆張出長龍翰即博  
士鉅公老師字之曰吳式賢後生晚進尊之曰吳古梅  
次龍光丞相訥齋以其甥劉氏妻之先公二十二年  
卒年僅二十五次龍翼以後從弟先公二十一年卒  
年僅二十孫男三人霞舉有易學丞相訥齋以其兄之  
孫妻之次霞蔚尚幼龍翼之嗣曰霞尚女一人許適汪

祖尹曾孫男一人即桐老於戲原人之行可以愚鄉曲而不可與遇一朝之變舉子之文可以霸場屋而不可與論百世之遠盜賊兵革數也室廬貨用物也物不能逃乎數之外而公之帝臨天隲者不與物囿於數之內攸好德考終命全而生之全而歸之其無愧於行已如此博士初應里選深孝弟之根窺性命之奧非以賈青紫也嗟天葩吸月卉爍先秦肩盛唐後子雲必好無疑尚書直院王公應麟大卿檢正宇文公十朋武魁南雄

守程公鳴鳳亟稱之蓋淵源有自也其無愧於教子又如此  
博士將以十月二十八日庚申奉重窆於郡城之南七  
里實公所自卜姑識其大者以銘銘曰

季氏八佾昭公乾侯雖孔之憂非孔之羞友堂連肖竹  
林滄洲韓史之世孰由就求泰山之陽大盜曰虎未聞  
善人為其所脯刼火不灰存我場圃心焉為苗德也為  
宇載謀載裕曰典曰墳不詭以獲燕及後昆維友堂有  
孫率舞于韶人而無耳鏘其文聲祝合啟止維場圃有

子此之所有彼無之禮後言詩西河之師此之所無彼有之不才窮竒史撻厥辭梅也實也桐也支也不蝕不糜傳不在茲

存耕處士汪公

庭桂

墓誌銘

王球

大江之南吳楚之區歛西有州婺源婺源有世家汪氏觀夫世數之近遠事業之崇卑則前人積累之功有可得而徵者矣傳所謂德厚者其流光德薄者其流卑詎不信哉至正十二年春汪氏有德麟者以其大父安南

等處行中書省左司郎中庭桂碑石未建介州人王元奉前進士余深狀致辭於宗老尚書汪侯侯覽狀曰真豪傑之士圖不朽實予之責屬老病命宜興州判官用敬以余公狀俾門生寧國路總管王球為之辭敢不諾且請福建廉使貢師泰書其文中書平章政事張蔡公珪篆其額俾德麟刻焉汪之先出於姬至魯成公支子汪受封食采潁州至孫都司馬誦始以王父名為氏為六十八代祖至今世系皆可考詳見世譜錄中其始居

烏聊者則越國公華奉籍歸唐君傳在太史氏總戎來  
鎮婺源者兵馬司道安徙婺源者御史大夫墻捍禦保  
民占籍鱣溪者則中元也於君為十三世祖曾祖潁州  
學諭颺生倬則府君之大父也考通母程氏祖父皆以  
善及人垂休委祉建於郎中公起而承之公諱庭桂字  
秋芳別號存耕幼有大人志廣顙豐下目光如電神采  
毅然性資睿十三明蔡氏書十八舉進士第授紫陽書  
院山長積階至迪功郎廣德軍司戶參軍善騎射熟孫

吳兵法以策干南康知軍葉公聞公奇之未幾謝太后  
詔天下立壁壘以自衛愚民幸變公為文諭之聞者敬  
畏既而宋社屋矣遂絕意仕進元圭兄弟以周勝納降  
卒成者公力也會劉國公平安南版授公本省左司郎  
中辭曰能終養父母足矣不願乎外也士大夫益以是  
高其風公之才之美過絕人遠甚監郡瑪蘓庫良二千  
石也公一見侯輒加器重恨識之晚公言五事凡誅黜  
吏者十餘人平反死獄者二家出偽楮株連者百人侯

服明允凡政事有所未達輒咨訪由是留置館舍顧遇  
日隆府判摩和巴往賑公預出所儲以濟流莩其不能  
自食者倅笑曰諸大家積庾廩乘歉為己利公對曰公  
私墮之道饑相望吾能獨享所有耶其處心蓋如此與  
倅坐堂上諸孫以次進拜說書倅舉觴告公曰能遺子  
孫以詩禮實中朝希有族子文冒犯先墓出之終身不  
得與宗族齒有婦早年孀居自誓靡他舅姑欲奪其志  
公戒之以全節婦其啟迪人多此類能使人化服若是



年在髫髻時諸父常等疾之再謂公考曰宜擇賢立後  
羣從諸父兄弟病於征徭公不修宿怨反出私財以佐  
集事婦舅氏程妻弟李終養其生死葬焉其篤於倫理  
又如此其於賑鄉善族卹姻字貧又有推仁之才暑粟  
之周禦寒之續免利之黍死無治喪者給棺衾修川梁  
徑路以濟往來免官驛之病民建法輪以超絕肩為惠  
尤大事親孝親歿殫力市壤親卜佳兆振門戶樹家聲  
百廢具舉制節家事嚴而有恩妻子聞其謦欬皆斂手

正容母敢肆也晚搆樓西山麓以自娛公生宋淳祐戊申二月八日歿于今天子至治元年辛酉六月四日壽七十四往弔者戶外屨常滿如喪所親為當時歸重如此夫人李氏與公同年先八年甲寅卒子琰等奉治命葬休寧楓木嶺其次子琮以狀介處士黃清夫詣京師乞銘於澹翁張公有故得篆額而歸焉子男三人長琰次琮次琪孫男九人德馨德禮德聚德麟德和德本德均德美德慶德美天曾孫男鎮祖毅祖煥祖應新繼祖

光祖英祖康祖文斌棣祖昭祖宣新文偉文亮文啟惟  
公之里居世緒列於家傳趨操行事施予惠利播於余  
公所為狀庸敢掇取其大者以為植德之符而表顯之  
竊觀自昔草昧之初出其經綸之蘊以翊扶興運者固  
已策雋功而建榮名其懷才不試以節行自保而甘老  
於丘園積久必發亦莫不有以庇賴其子孫表見于後  
世蓋木必其本水必其源本深則末茂源長則流遠豈  
偶然哉有若郎中公親享其報年登八袞及見其三子

九孫為時俊傑此則世之希有者也且曾玄蕃衍又能  
顯融以亢其宗豈非積善之報自有不可揜者歟銘曰  
顯允汪公展也全人惟忠惟孝萃于厥身其忠伊何不  
仕二君其孝伊何歸養雙親動人者義澤深者仁詠歌  
道德為時貞民用能光大厥家而儲休委祉于後昆蟬  
聯五葉彌久益振推述潛德表諸蒼珉揭于墓門曰忠  
孝之子孫

元贈光祿大夫大司徒柱國追封楚國公謚孝肅

程公翔卿行錄

程伯名

公諱翔卿字羽道初名應龍生于郢州之京山自曾祖至公居郢三世矣家富而遵禮義宗婣之指數百戶外之屨常滿邦邑稱為望族時號長者之家公謹厚明敏讀書通大義未冠侍親奉大父避兵乘舟東下南入彭蠡擇吳城山濱湖之地以居公兄弟三人而公居長其父師曰居家理故治可移於官長子克家者也蓋自治乎於是一門之政悉咨於公持身御衆斬然有法內而

奉甘旨教子弟外而接賓客館遊從雙親壽考仲季宦成公之力也既而季曰飛卿受命守建昌公侍父母就養郡城南隅有故侍郎曾穎茂兄弟居址公捐金以贖其地築室奉親居之孝友之道雍如也先是飛卿以進士佐洪閫即吳城建壕柵集義兵禦外寇公散家財鼓士氣制馭其中隱然重鎮至是宋鼎告遷公審機識變決策全城撫安境內日惟以止殺戮安凋殘為勸戒由是存活益衆洪盱之民沒世賴之而公不以為德也至

元丙子中軍元帥呂公師夔將命來盱江見公而器重焉大將李公恒表聞於朝特頒璽書授公朝列大夫管軍總管佩符綰綬兄弟分任兵民建節一邦金紫輝映時人羨之而公不以為榮也又明年公子入宿衛旋貴于朝公即謝軍營別墅城南之繞堆距城可三十里象郢之石城構屋為遊息之所自號石城居士將終老焉或挽其入燕京公曰吾家積德累世嗣子行顯用矣獨不聞王氏植槐之事乎吾尚何為哉壽七十五考終于

家生宋嘉定辛巳四月七日沒元貞乙未十二月四日  
與夫人李氏俱葬繞堆大盤山之陽子孟一早卒女適  
建寧路判官曹某趙某同知某路事江某我大父文憲  
公自幼以從弟來後從宋制也公沒時文憲公持憲節  
闔海奔計歸葬藩憲之僚守貳將帥弔祭盡禮所謂生  
榮死哀者耶至大戊申文憲公以翰學議中書事制特  
贈公正奉大夫參知政事追封郢國公諡孝肅延祐丙  
辰加贈光祿大夫大司徒柱國進封楚國公夫人李氏



由郢封楚制詞畧曰活千人者必封事將有待作三軍而謀帥賞未足酬故具官程某弘毅而孝恭高明而肅括因心則友早竭力以事親順天者存克沈機而先物千里之風塵不聳一方之塗炭獲蘇並疇昆弟之榮分任兵民之寄顧乃功成不處抗志自高又曰早躬孝弟之行晚甘恬退之風賞不酬勞遺愛未忘於千里教之能仕移忠遂立於四朝又曰身居公鼎雖不逮於生平手植庭槐尚適觀於世濟嗚呼盡之矣公沒垂六十年

而陵谷變遷故老淪謝遺事不傳謹採摭行實書於家  
乘以示子孫無忘可也

孝善胡先生

斗元墓誌銘

戴表元

元貞乙未歲冬十月十有七日徽州婺源鄉先生胡公  
卒聞卒之日自公州里宗黨知識若遠外學士大夫皆  
嗟歎失聲以悲其門人子弟俞洪等一百十五人相與  
攷次公平生言德用古隱君子私謚例尊稱之為孝善  
先生公之世本出大唐李氏五季之亂逃來寄姓於考

水之胡因籍焉字昌翼以明經中科八世至國子司業  
伸與同郡汪內翰藻齊名元符太學所謂江右二寶者  
也弟侃所著書有胡氏家寶棣華集存於家自是又三  
世有徙考川居婺源鄆東集賢里者以學行推擇為鄉  
校正諱允濟於公為王父四世有通五經尤精易撰易  
傳史纂號易簡居士諱師夔於公為父一門十餘葉絀  
素相傳故徽之地胡雖多聞家而獨考水之宗號明經  
胡氏公諱斗元字聲遠少孤師朱文公從孫小翁受書

說年十四始從小翁聞居士所授易學刻意探述日玩  
一爻至七日則通六爻循環習之白首以為常亦以此  
教其徒當貢舉法行徹士橐櫛筆起山林出與四方英  
俊爭進趨往往高捷鄉國每三歲上公成均有司不足  
以知公至輒聞罷乃徑歸闔門養志以樂然慕從之遊  
者遐邇如歸餐華茹實人可為良儒嘗曰乾專言善坤  
無言善不善乾之善世吾無及已坤之積善吾庶幾勉  
之早夜修飭懼辱其先尤以不逮養為終身憾春秋朔

望拜祀像涕泣不能已塋壠時躬灑掃老不避勞人謂  
年彌高而慕彌深者於公見之噫嘻公誠可為孝善也  
己年六十時忽語諸子曰吾筋力覺衰遊人間世當可  
餘十稔顧考水吾念之不能一飯忘吾死汝輩必葬我  
考水至是論訣復屬諸子我家明經胡氏子孫汝輩力  
學積善無辱我享年七十有二諸子以丙申秋九月十  
有七日葬公考水之高倉太守涿鹿翟侯大書曰孝善  
先生之墓娶魚氏子男三炳文煥文燦文女一孫男四

念祖振祖光祖德祖孫女四於是炳文以其鄉先生方  
使君回前進士江雷胡次焱程龍之議與狀來丐銘銘  
曰  
燕其獨潛其伏既安既穆是為孝善之卜

中山處士汪君

應新

墓銘

虞集

君諱應新字元美姓汪氏新安之祁門人新安領州邑  
六民生衆而多秀汪氏居十八九又溢出旁郡而處處代  
有顯人君之先自歙之黃墩徙祁門之石山釗自石山

徙邑南之韓溪其五傳有兄弟七人並以才賢稱據縣  
志其弟五人世容之子深分居桃墅之別業四傳曰僑  
於君為曾大父曄其大父燦其父也燦字明夫世治進  
士業鄉里謂桃墅曰儒林矣燦早卒而從弟文華字榮  
夫有五子明夫之配王夫人請以君為之子初榮夫之  
夫人程嘗以果餌賜諸兒微示予奪以觀其志而君弗  
變也其親賢之榮夫與羣從昆弟學於鄉先生趙永如  
氏與故中書右丞燕公公枬為同門至元初燕公既貴

招汪氏兄弟為祿仕歲冠褒衣以居弗從也而榮夫又嘗從雙峯饒伯興氏學而有聞焉者也君之為明夫後年十三歲事母有孝道時方多故補葺家業以為養處鄉里姻戚歲時無關禮母不知其艱孤姊妹未嫁者三人竭力營資裝嫁之各得所歸娶康氏同邑貢士且實之女善事于姑勤儉以相成其家君有賓客延待無勸孤姪未嫁脫簪珥以嫁之一門稱其賢君與同產兄弟雖異居而周恤扶持人無間言其教子有過則責之甚



嚴知改則說之如初其子曰義隆義彰克仁克寬克端  
皆業儒義隆早卒克仁為伯氏後女適同里余友仁友  
仁卒而守節誓終其身孫男七齊益希景偕均老女四  
曾孫男三鏐鏞鉉信乎其為儒林之盛也夫君資幹聳  
特偉然丈夫平居無惰容嫺語剛正自任議論忼慨博  
洽稱其家學嘗著便民二十條皆民間要務將上之臺  
省而不果是以人信其才之可用也乃不見用其命也  
夫生宋開慶己未十有二月廿又九日晚遊江淮間雅

好山水識其性情之妙而樂之年且八十髮不變白耳  
聰目明居鄉里間舍輿而徒亦弗杖也常如五十許人  
桃墅之居特起之峯曰中山君構書堂以處鄉里號之  
曰中山處士云溶口先塋之所在也君少年時或易君  
而侵其封君力陳有司四年而後得直其人敬服君且  
老屬其子曰吾歿則祔於先塋仍改至元戊寅六月癸  
酉居室火君夜半率長幼出避之家人請還救器物君  
曰外物也無傷人足矣怡然遷處別室以居既而得疾

諸子治醫藥甚謹君曰吾生於憂患瀕死者屢矣年已八十復何求哉遂以是年九月二日卒康夫人生少於君四年卒後於君一年己卯十月七日也其孤將以至正二年十有二月乙巳奉葬諸溶口克寬以其同郡同姓承直郎南康路總管府判官巽元所著行狀徒步千里來求銘予識巽元於京師克寬方赴南宮在焉今十有五年矣克寬論春秋於胡氏傳最習能通其類例以為書泰定丙寅以其經薦於浙省有文聲于東南以君

夫人之養嘗居家今年天子復以進士取士而克寬齊  
哀未除也企其為學行將有光於儒林也夫故為之銘  
曰

新安之汪族偏其邦其貴有加其厚有封鬱鬱儒林居  
十餘世含英茹實子孫孫子中峯之隆可出雨雲盤礴  
弗施蓄而彌文溶有先塋冲氣所始遠而思復培本之

理是用表之別異其宗後人彬彬以承顯融

右中山處士汪公墓

銘一通其文則虞文靖公集所造其作隸古書則南雄  
守楊君益也處士之子鄉貢進士克寬既已勒石墓門

今年克寬與濂皆以纂修史事被召來京克寬復出以相示請作小篆書之裝潢成軸以傳示子孫嗚呼處士之歿已三十有二年其藏體魄于墓亦且二十八春秋矣克寬能惓惓弗忘如此非厚之至者乎非欲昭先德於無窮者乎人聞克寬之風可以知勸矣洪武二年六月二十四日前起居注金華後學宋濂謹記

元江西湖東道肅政廉訪司經歷贈嘉議大夫

中書禮部尚書上輕車都尉追封滎陽郡侯鄭公

紹墓誌銘

危素

公諱紹字仲賢姓鄭氏世居徽州歙縣之長齡里四世祖顯文宋迪功郎諸王宮教授曾祖世卿祖天麟武節

郎積善尚義至元十三年大饑發廩粟活數十人鄉黨  
稱為長者生二子長太學生孟孫贈從事郎信豐縣尹  
次貴孫贈亞中大夫同僉太常院禮儀院事輕車都尉  
追封熒陽郡侯配汪氏初封宜人繼贈滎陽郡夫人次  
可孫公之父也母鮑氏生二子公其仲也為伯父後資  
質穎異師前進士曹先生涇既長倣儻尚氣誼喜周人  
之急不計有無推食解衣無吝色兄弟雍睦既分財產  
公一以讓曰吾所知者天倫之重爾家聲由此益振從

外舅汪公巽元遊宦吳楚內翰趙文敏公歸老吳興與語  
奇之薦為鄮山書院山長書院棟宇傾圯教養久廢修  
治惟謹借注保昌縣文黃砦巡檢廉介自將境內清肅  
雒陽楊公益守南雄待以賓禮未幾蘭河平田上翔等  
寨缺官郡檄公總攝治效尤著久之民有急難者赴之  
病者藥之俊秀者誘教之未三年頑獷之風遂革廣東  
宣帥用楊薦辟為史漳州民李叛公從軍潮州運籌招  
捕未嘗橫戮無辜者至正二年調將仕佐郎南安總管

府提控案牘兼照磨承發架閣大黃五寨之民間公始  
至不遠數百里具雞黍壺漿羅拜庭下曰明府德化素  
孚於我我等何敢忘故來為南安賀僚屬郡人莫不驚  
嘆公馭吏有方文書清簡郡為要衝過客旁午送迎無  
虛日舟車之資慶餞之禮多竭私帑以供之或家兒從  
事貨殖者公聞輒曰若此雖廉吾所不取貧而能守有  
餘能施乃吾志也至正七年升從事郎贛州路雩都縣  
尹吏或曰公止邑民之訟必以法繩之公曰吾與之相



安無事民何能生訟居歲餘部使者以獄空訟息大喜  
語郡長令公曰雩都治蹟甚高可善遇之時令公下車  
未久即遣使宴勞仍命詢訪旁縣民瘼興國縣民之冤  
公為伸之未幾冠犯江西贛之屬邑皆陷獨雩都賴公  
所作新城示以守禦之方縣卒以安尉馮深招諭葛垸  
平頭印山青塘等寨卒無成說郡府申命公行民間公  
至皆涕泣縛其首惡五十餘人送郡亂由是息近臣祭  
南海還以公名聞於朝十三年御史臺選為江西湖東

道肅政廉訪司經歷進徵事郎未及赴九月庚申以疾卒於雩都官舍享年六十有六贈奉訓大夫大宗正府左右司郎中飛騎尉追封休寧縣男加贈嘉議大夫中書禮部尚書上輕車都尉追封滎陽郡侯娶汪氏封宜人贈縣君追封滎陽郡夫人子男三人潛泉州路總管汪瀨女三人長適吳鶴次適羅相次未嫁而卒孫男四人權桓挺權女三人曾孫男三人女二人初潛聞訃奔喪至於關道梗不能進廼卜邵武某鄉芙蓉坡之源將葬

公於此乞予銘之予嘗識公於京師以事過歛聞公與夫人賢行汪公方致政家居期待殊厚銘得遽辭哉銘曰

治世之吏鄙夷遐荒羊狼狼貪久罹其殃公用儒術警邏保攘總攝五寨民物用康宰邑雩都化服有方涕泗歸歟免于斧斨邈彼下土政教靡詳孰扶爾弱孰擊其强稽公之蹟惟德之將惟德之將惟後之昌尚被封爵家世用光招魂瘞此閩粵之疆于賴于微千里相望勒

銘芙蓉何必故鄉

歙士吳寧之

以寧

墓誌銘

虞集

徽吾朱子父母之邦而所封之國也是以多君子不可  
一二名歙士吳以寧字寧之中郡城以居能處其家而  
有善人長者之目於一時可謂難能者矣其生以前至  
元甲申之二月初娶蔣氏生女一人而沒再娶於鄒生  
子曰國英廣德路建平縣儒學教諭曰朝英習進士業  
女適胡執中次在室寧之年六十作壽藏於郡城北鳳

鳳山之麓以待其終暇日則攜酒饌賓客而往樂焉兼  
有曠達之譽矣年六十三而沒則至正丙戌之正月明  
年八月奉之以葬國英之受業郡庠也里人汪克寬訓  
之有師道焉是以國英等請述其事而來求銘克寬曰  
寧之居近闌闔而世俗公私之務雖無所不聞而未嘗  
有所干謁闢齋居於門內藏書數千卷勗其子以學非  
名師良友弗致焉郡縣守令有終更不得見其面者而  
賢人之車轍屨迹多在其門戶故翰林待制楊公志行

大儒也方嚴少許可其官於是鄉特書汝舟兩大字以表其齋居蓋知其可用於當時而又有望於後來也往役于官凡鄉鄰之民差徭兩稅力不逮者悉自任之郡邑四交羣嶺峻阻任荷負擔不絕少壯罷病每共周卹以惠之貧且賤者感其惠之有常也天歷戊辰蠻獠叛于廣南郡將盡發其屬卒以征兵狃素安弗堪也其悍者鍾乙等十餘人持挺入大家劫取私藏相捍拒莫之能制寧之之家獨隨所有予之不競也事聞有司當卒

以強盜之罪獄成九年後至元丙子朝廷命五大府遣  
官慮囚天下其至徽也坐獄者皆在而被害訟于官者  
已前死召寧之問狀及所以獨不告官之故曰兵興卒  
求賄耳無殺人意非強盜也官用寧之言破械出久囚  
者則長者之名所由得焉至正辛巳郡災火至寧之家  
而止其室獨完以為陰德明年官寺稍完復而又災鄉  
人待寧之而食者百餘人鉤戟繩鋸及致水之具以衛  
其家寧之謂之曰吾聞有災患當先公後私即率其衆

詣府撤其西廡火路絕而官舍免明日郡長吏大為酒  
食以謝寧之弗受也又出楮幣索球者名而勞之寧之  
又曰親其上而死其長民之義也勞之則不見義矣郡  
人甚黷之晚為別室於居左尚恬淡以怡精神不以家  
務自累名之曰一齋而人亦以是名之蓋逸樂以終其  
身焉克寬又曰歛之故乘在李唐時有監察御史少  
微而英之宗皆出焉歲遠譜逸宋末自鄉而徙居郡城  
者曰彥珍鄉人猶識其為御史之族云生子松無子而



郡有汪氏大族聞於四方生其門者多材藝有名實松  
求諸其宗得道榮焉尤俊偉祝以為子而國初遠郡未  
有以自試稍推擇郡史已而去之優游養生之學著醫  
書曰去病簡要者二十七卷并近體詩若干卷藏于家  
生二子曰安嘗征商於縣之松原其次寧也安長無子  
道榮命安子寧寧所以事其兄如父事嫂如母任子職  
而弗辭也他日安有子曰以潤九歲曰以德甫一歲而  
安沒寧鞠育撫養尤盡其慈愛卒之日又語以潤以不

能盡喪母之禮也初寧母金生寧而去適於他有同母弟妹矣寧求歸養之不可終身以不得申其情事為慊也其亦善處人事之難也矣銘曰

長者好惠常善救人奮挺為強猶完其身反風滅災報以安宅赫赫郡庭仰以無慝陰德之門善繼其存惻怛逸休以遺子孫山鳳揚彩樂丘斯在神氣旋通餘慶垂代

新安文獻志卷九十二上

欽定四庫全書

集部

新安文獻志卷九十二  
至四下

詳校官中書<sub>臣</sub>孫衡

侍讀<sub>臣</sub>孫球覆勘

總校官庶吉士<sub>臣</sub>倉聖脉

校對官中書<sub>臣</sub>吳甸華

謄錄監生<sub>臣</sub>梁鳴岐

欽定四庫全書

新安文獻志卷九十二下

明

程敏政撰

行實

世德

吳處士

伯岡

墓誌銘

解縉

新安齊國文公闕里也遺風餘韻奕世猶存自宋亡元興時則有若程勿齋吳義夫汪古逸趙子常鄭彥昭汪惠輔倪士毅朱允升鄭師山唐三峯傳至國初以性命義理之學講淑諸人皆不失為文公之徒也予嘗聞而

為之羨慕焉今戶科給事中兼司經局校書吳君彥守新安之世家也同官多暇因考論其師友淵源而君為予泣以泣奉唐君子儀所為其父吳處士伯岡行狀求銘勒於其墓按狀伯岡從學於子常彥昭而講於惠輔以下諸君子儀三峯之子也文公之澤豈不長哉考吳氏系出漢長沙王芮四男分居新安休寧歙縣其後有諱少微者仕唐為御史曾孫瑶自休寧徙居歙之富饒瑶生叔臻叔臻生明明生超興元甲子遷居海寧超生

春春生天推天推生琇為令休寧因勸農歷諸鄉愛金  
竹山之勝復徙家焉第四子依舒通守閬州者分居吳  
田依舒生子志子志生泉湧泉湧生士雋士雋生積積  
生道傳道傳生琬琬生逢辰逢辰生梓榮宋迪功郎吉  
州泰和縣主簿梓榮生彥松彥松生邦呂歷官成忠郎  
年九十餘乃卒邦呂生柔遇柔遇生賁龍元承直郎太  
平路繁昌縣尹號屏山先生生之泰之泰生淵字萬頃  
號白雲先生是為伯岡之父其配某氏伯岡之母也伯

岡諱玉林甫六歲日記數千百言皆通大義成童有詩名習舉子業齊輩推服試有司不利未嘗恨父子師友之間講明學問甚自樂也天兵下歙辟為叅軍未幾棄去竟以隱終方元季兵興時伯岡總其家政內外整肅事親極孝養尤克友其弟祖瑤遭橫一身當之而弟與親不知也妻之先宋丞相元鳳諸孫盜乘亂欲劫其家其家逃匿盜蹤之欲加害伯岡盡出其私財與盜以免之其里人有疾衆謂不治求良醫竟活之其收養孤

遺賑恤窮乏如將不及里中土宜稼而常以旱為憂出  
其私本鑿山引水為渠既成而旱不為之災民咸利之  
建義莊積粟以備祀先上冢聚族人宴會分給之里人  
咸服其義有爭競求直者或得一言而止嗚呼仲尼云  
施於有政是亦為政非伯岡之謂歟伯岡平生所寓意  
多見於詩有松蘿吟藁一十卷藏于家生於元延祐丙  
辰五月十有七日歿於洪武庚戌十有一月四日享年  
五十五後十五年葬于某山之原配程氏宜于家族後



二年卒年五十一子男二人長樵早世牧即彥守初為縣學生以勞績擢紀善至今官女一人適江仕翔孫男果善功遠孫女適江彥華銘曰

顯允吳君篤實之學良貴既榮豈慕人爵拂衣轅門白駒空谷義倡于鄉仁恒其族鄙夫吝財剖身藏珠矧曰衆早私資築渠矧曰寇至求金求璧我竭我藏庇其親戚其生也榮其沒攸寧其後宜昌不爽于銘

贈嘉議大夫都察院右副都御史程公

順道

神

道碑

楊溥

公歿之四十八年朝廷以其孫貴推恩褒贈制得立碑  
孫富奉刑部侍郎楊寧所述狀請予文予與富有斯文  
之誼許之公諱德字順道以字行其先出重黎之後自  
伯符封廣平累傳至元譚仕東晉為新安守有善政賜  
田宅於歙因家焉傳十三世有諱靈洸者以武功顯於  
蕭梁卒謚忠壯立廟歙之黃墩歷代崇祀其他以詩書  
顯宦者後先相望公承緒惟謹夫孝友百行之魁公事

二親得懽心親歿哀毀踰禮兄弟六人自幼至長友愛無間言此其孝友也道之所進必始于家公以禮義為教每旦坐堂上諸子偕婦序立堂下聽訓告不命之退不敢退一門之內長幼肅然少有過輒詰責之此其刑于家者也三物之教貴能卹人公見饑寒困苦不啻在己濟之惟恐不及隣里喪葬嫁娶有不能成禮者樂為之助假其貲者久不能償則焚其券近居河水泛溢為涉者病乃捐金為橋恤人之心惓惓如也起家之道莫

先教子教子莫先詩書公嘗曰家之貴顯增光先世者  
皆由子孫讀書知為善以富器宇超偉乃遣充郡庠弟  
子員命諸子歲資衣食之用使專心問學復益以一廛  
為後日養廉之資其教子孫之意至矣富永樂甲申以  
鄉貢進士起家卒業成均授監察御史巡按江西以平  
賊功陞大理少卿累陞至副都御史歷官三十餘年荷  
國家推恩先世贈公嘉議大夫都察院右副都御史龍  
章鳳誥光賁泉壤人咸謂公積德為善天固報之非倖

也壽六十九洪武己卯七月二十四日以疾卒是年十一月葬邑之仙人巖祖三益考雷甫世有善聞俱隱終母殷氏族里稱賢娶吳氏繼室汪氏皆名家女俱贈淑人子男八人長仲仁副都公之父吳出次仲義仲禮仲智仲信仲友仲文仲武汪出女三人長適項以忠次適畢宗願季適巴以文孫男二十四人長曰喜次即富也曰彥通曰彥珉曰學可曰學進曰彥器曰彥傑曰彥舉曰彥鵬曰學初曰學賢曰學能曰志學由鄉貢進士令

弋陽以廉勤見稱曰彥清曰彥榮曰彥昇曰彥祥曰彥  
昭曰允恭曰允儉曰允讓曰文彬曰文耀俱知力學承  
家孫女一十六人曾孫養中養誠養耕等五十三人後  
嗣之盛皆積德所致也嗚呼以公存心制行使其出用  
於時必大有為以廣利澤而乃歛器弗施終於家食人  
孰不為公惜邪及其孫洊膺顯任國家推恩於既歿之  
餘人孰不謂天之福善不于其身必於其子孫也况富  
為時名臣能聲偉績振耀當世駸駸未已易曰積善之

家必有餘慶詩曰孝子不匱永錫爾類後之人尚體念之哉銘曰

孰約其躬孰顯其終約以俟命顯以善功紫陽奕奕黟水融融山環水遶君子之封惟後之振惟前之光宜爾子孫篤念無忘

贈承德郎行在兵部主事吳公

發行狀

方勉

贈承德郎行在兵部武庫司主事吳公仕仁墓十有九

年子寧始蒙恩以已官贈公謂勉同里俾狀行實將求  
文以表諸墓按譜吳之先出延陵季子至漢則長沙王  
吳芮唐則御史吳少微公之族蓋少微後也世居歙之  
澄潭幾六百禩曾大父諱祖大父諱關父諱森秀咸隱  
居弗耀母汪氏有淑德公之父兄皆蚤世而族伯父明  
善自澄潭出主莘墟宗叔雷應祀雷應者文英子也明  
善家雖饒裕乏嗣人擇公繼之宗祊僉允公既後明善  
曲盡孝養事母許孺人與庶母楊氏一如所生撫季弟



士安俾克成立其篤於孝友蓋本天性公諱發仕仁其  
字頎然其躬美乎其髯風度凝重雅尚儉樸不事侈靡  
暇則披覽羣書沉潛性理至於陰陽醫卜堪輿諸家之  
學亦旁搜遠攷各極厥旨公生質美學術富鄉鄰有爭  
必質公門斷以片言悅服而退匱者求濟患者請恤公  
咸應之莫有吝色宜宗族於公而和好戚里於公而敦  
睦人徒知其存心濟物如是而不知其治身理家有道  
也明善當元季產稅甲里中役繁賦重久而困約皇明

撫運始獲休息所存者屋百間田百畝歲用或不給公  
竭力以持門戶不憚勤苦塋域第宇咸修葺之資產寢  
豐端復其舊配許氏贈安人有內助之力子男三伯曰  
安仲曰壽季即主事寧也英秀卓傑未童州公遣入郡  
庠中永樂庚子鄉舉第庚戌進士筮仕兵部褒贈二親  
人皆謂公善教女四適岩鎮方永誠琵琶塘胡士亨朱坊  
徐汝庭許村許蘊孫男七曰紹曰綸曰繼曰綱曰經曰  
縉曰紳孫女六公生元至正甲辰冬十二月二十七日

卒永樂丁酉春正月三日享年五十有四越辛丑十一月朔三子葬公於歙北通德鄉龍溪之陽然未有誌者蓋有待也於戲吾歙吳氏著姓莫過澄潭觀公之孝友利物如是宜其大濬慶源以承休祉而隱處終身弗躋上壽非囿於命與數邪是知公之獲褒贈非幸也宜也寧之仕實發軔之始其躋陟顯顯蓋未艾勉故備錄公之潛德併述其族系爲狀庶幾作表誌者有所采焉

贈亞中大夫太僕寺卿程公晟墓碑銘

李賢

刑部右侍郎程君以天順甲申五月七日合葬其父亞中公母太淑人於河間城東金沙嶺之原乃奉其世譜事狀請予銘其墓上之碑予受而讀之嘆曰於戲天下著姓若程氏者無幾蓋程系出重黎在周休父封程伯子孫遂以為氏其後嬰立趙孤望著廣平至東晉新安太守元譚始家於薇傳十三世曰靈洗仕陳至開府儀同三司謚忠壯土人廟祀之宋元累封忠烈王王十四

世孫灃唐御史中丞歙州都知兵馬使子南節居休寧  
陪郭公之所自出也初忠烈五世孫大辨北徙中山博  
野再遷河南九世曰琳宋太師中書令謚文簡曰珣太  
中大夫生子是為明道伊川二先生靖康末子孫從渡  
江居池州曰祉仕終休寧尉遂與陪郭同居故休寧之  
程於二先生為近族南節十二世孫曰榮秀仕元為奉  
直大夫江浙等處儒學提舉公之五世祖也高祖文貴  
宣義郎德興縣銅冶場提領曾祖社至正末用薦為承

奉班都知不赴祖吉輔叔祖國勝事高廟為統軍萬戶  
死節南昌追封安定侯諡忠愍考杜壽嘗應聘不受官  
贈亞中大夫太僕寺卿妣汪氏贈淑人公字士明諱晟  
天性孝友洪武中聘君坐累謫戍北方公在髻鬣侍行  
即慨然有亢宗志比徙於沁再徙衛輝三徙河間雖徧  
經險阻家業不墜父母安公之養如平時汪夫人有恒  
疾湯藥必親調齊每夜露禱求以身代者二十年未嘗  
以風雨急迫一日廢焉疾良愈弟昱公友于甚至弟愛

城中里舍日估之利即舉以畀之乃自督家人農耒幾  
土沃田腴所得反勝城市第又欲之公復以相付無吝  
色既而昱喪撫其子女如已出侍郎生有偉質公每撫  
其首曰吾家本世族不幸播遷於茲窮危久矣振吾宗  
者其在汝乎因遣入學親課其業底於成公襟宇闊略  
美鬚髯撫謙雅飭郡中名士多願內交雖家不甚裕逢  
人急難寧自損以濟之性尤子諒見者知為善人嘗如  
京師有二盜尾其後數日將抵都城二人者忽相去之

曰某等盜也見公長者不忍劫以相懼其言動感人如此既疾草猶強起拜於祠堂惟以親老不克終養為恨公生洪武庚午十二月十一日卒正統丙寅二月六日享年五十有七以侍郎貴景泰中贈徵仕郎吏科左給事中天順初贈亞中大夫太僕寺卿配張氏鳳陽五河人父政洪武中為元城縣簿亦以誣誤謫戍河間母蔚氏時聘君與元城同患難而相好聞淑人有懿行因求為子婦蓋凡公孝親友弟教子處家之善淑人相成之



力居多舅喜賓客淑人躬任烹飪之勞能先事承順其  
所欲酒殽有或匱者即脫簪珥市以繼汪夫人晚歲失  
明淑人亦年六十矣起居服食之奉皆身親之已而舅  
姑相繼沒亞中公早已下世二子皆仕在外淑人竭力  
營二喪無違禮歲時相祀必務恭潔如事生者尤有識  
鑒每侍郎有委擢之榮親黨入賀淑人不色喜曰是重  
其負荷者敢以為榮邪晚就養京師祿入雖饒而自奉  
儉素尤不喜僧尼巫覡每曰此輩能隳人家範闕諸門

者必令家僮麾去之壽登七袞玄髮不改初淑人生五  
年縣簿公得罪遠配凡所歷如宛城青塚李陵臺岢嵐  
城之類淑人率能道其時與事每對家人語及之輒泣  
然曰吾懼汝曹不知起家之難有自肆以取敗者淑人  
生洪武癸酉十月八日卒天順甲申正月二十九日享  
年七十有二初封太孺人再封太淑人子男二長信即  
侍郎也起進士敍歷中外清譽著聞次佑以武功至瀋  
陽中屯衛千戶女四長適教諭白璣次適王哲次贅田

寬次適百戶江春孫男五長敏政以童子舉召入翰林  
讀書中京闡鄉試經魁次敏德敏行敏功敏中孫女三  
許適指揮子錢鐸千戶子趙瑛指揮子凌雲漢先是公  
沒藁葬河間城西淑人之喪今上遣官賜祭復命有司  
營葬事子孫顯名存沒有耀人謂公夫婦積善之報蓋  
不爽云銘曰

程氏之澤遠且長前有貞君後循良陰功孕此忠烈王  
奕世金紫傳其芳竭從江南居北方溫溫亞中德允臧

上承下啓流聲光淑人系出清河張婦功母道儀閨房  
一文一武侍兩旁文尤顯赫居巖廊嗚呼二老真不亡  
存沒之寵迥尋常錫有制命莫有章瀛城之東金沙岡  
守臣奉詔營此藏喬木宰樹紛蒼蒼太史刻銘表玄堂

後千百年殊未央

學士永新劉公定之程氏義田記兵部尚書兼大理寺卿程公彥實葬其

考亞中府君妣太淑人於河間郡城東金沙崩之原環其塋牆田五百畝皆公所有者公以己祿賜既足瞻其私無賴乎是田矣於是仰告祖禰旁會宗戚俯召佃傭而言曰是田吾不復私之也畫塋壘溝澮三分之其所收一以供吾祖禰之祭薦祠墓一以供吾宗戚之婚媾喪葬一以給爾佃傭之事畜饗殮備其勤俾勿怠庶收

入有常焉既言之復著簿厯開條目示儀則堅約束俾  
主祀事者司之擇幹用者析理之公廩與予道其事乃  
命長嗣翰林編修克勤來謁記垂久遠夫事之創端由  
己志然非與時遇合弗成也成而非有賢繼之其久遠  
詎可必乎昔范希文義田其志蓋謂吾先世積德百餘  
年而始發於吾若獨享富貴何願入家廟向使希文不  
出將入輔此志固無由遂抑非有主器善繼若純仁雖  
遂矣慮或隳焉搜庫絹以惠鄰黨捐舟麥以贖故舊純  
仁之心與父同符故希文中秋先夕詩有來日如登霽  
清風不負期之句若識其子之將光大也而果然焉噫  
豈苟然哉德厚而眉昌也國之功業且箕裘是似家之  
義田其舊畬是永矣難哉公欲久遠義田尚益厚厥德  
且期克勤圖之予記不克若錢公輔然事闕義文宜無  
靳矧克勤予較藝丙戌春闈所得士又造屬在院亦宜  
為公期焉公之先家徽郡忠壯公靈洗蔓延厥系於海  
內明道伊川實祖之其自徽來河間則近在皇朝初載

云

竇山處士程公

景華

墓誌銘

丘

濬

程以國氏出周大司馬程休父漢魏以前盛於廣平至東晉始盛江南而新安尤其著者其來也自元譚為新安太守始數傳至忠壯公靈洗居歛之黃墩又數傳至戶部尚書仲繁居饒之浮梁其子令涯徙祁門之善和里又數傳至竇山翁翁諱新春字景華以字行上邇忠壯公三十一世所居地有五山里人以翁家世積善比

燕山竇氏因以竇姓山翁遂以自號人亦以是稱之環  
所居十數里之人無少長惟翁言是聽出入興作惟翁  
行是視事有疑難者輒相語曰盍質之翁乎翁必有處  
此者矣行有悖理者輒相戒曰翁得無知之乎知之必  
不吾容矣欲赴訴於有司者輒相謂曰何事勞有司乎  
得翁一言則是非曲直有所歸矣情於治生者輒相訾  
曰翁之法不如是盍質之翁乎或不幸而遇患難有死  
喪及困乏者輒喁喁望且呼曰無有以我事語翁者乎

翁庶幾一來來則吾事濟矣用是一鄉人情者以勤匱者以足不善者以良風俗翕然以和及翁卒咸哭之慟且走相報曰吾翁棄吾去矣天乎奈何家祭而羣臨之者無虛日發引之日空一里之人畢會焉時景泰壬申閏九月也距其生洪武己未得年七十有四以癸酉歲葬於本里百花園曾祖仕榮祖德堅父汝揖母蔣氏翁生九歲即孤事母及祖父母克盡孝道居喪不御酒肉葬祭一本古禮以行念兄庭春戍遼陽終身不預燕樂



聞音律輒走避嘗率族人構堂祀先以合其同修譜明  
系以收其異其孝友睦婣之行蓋天性然也翁初配汪  
氏繼劉氏子男五人盛顯達懋讓女二人長適謝景春  
次適鄭克己孫男十六人泰貫通容密復憲宿宣文雲  
迪騰循慄度女九人曾孫男八人嗚呼鄉有善人一鄉  
之福使凡天下郡邑每鄉中皆得如翁者一二人以為  
斯民率先三代之治不可復吾不之信也翁之次子顯  
仕為韓王府長史得請致仕命其子戶部主事泰以其

鄉親工部郎中李君友聞狀來乞銘予與主事君同年  
進士也義不容辭謹次序而銘之銘曰

周大司馬曰程休父程之有氏蓋此焉祖始望廣平後  
盛新安惟忠壯公雲仍實蕃縣曰祁門里曰善和比族  
環居竇山峩峩竇山何有有賢一翁鄉邦是望族屬攸  
宗惡者以善醕者以醇翁匪今人三代之民三代之民  
絕無而有銘發其潛永昭不朽

明威將軍神策衛指揮僉事致仕黃公墓誌

銘

家乘

公諱琮字進賢世居徽之休寧其先多隱德至考彥斌  
甫妻徐氏女生丈夫子七人家始殷里之識者策黃氏  
必大貴既而仁宗昭皇帝臨御冊公女弟為貴妃特遣  
二中貴人驛召彥斌甫至京授神策衛指揮僉事賜第  
一區賚予恩數甚渥七人者公最長實侍北行上召見  
喜其重厚亦授錦衣衛百戶未幾彥斌甫捐館嗣為神  
策衛指揮僉事公雅不以貴戚自盈年六十即以官授

諸孫惟日端居自適而已成化初今上皇帝復冊公長  
孫女為秀懷王妃公之女適王氏者有甥曰增亦選尚  
嘉善長公主為駙馬都尉公夫婦尚無恙惟時以手加  
額曰吾家藉先世之靈迭被寵光飛香椒畹恨無德以  
將之聞者嘉歎成化癸巳九月十二日忽一疾不起享  
壽八十距生洪武甲戌二月七日上聞訃遣使者賜祭  
蓋特恩云公配桂氏南京錦衣衛百戶福之女以慈賢  
重戚里封恭人子男三長昱以親藩恩授中兵馬指揮

次晟嗣錦衣衛百戶次杲為義官女二長適錦衣衛百戶韓俊次適錦衣衛指揮僉事王珩孫男九長欽後公數日卒次鑑次鍾嗣神策衛指揮僉事次銘次鐸次鉞次鏞次鋼次銳女五長即秀懷王妃亦先公卒次適伏羌伯毛銳餘未行曾孫男一曰彭年女四俱幼公平生孝友事二親存養終慕如一日諸弟處江南歲時問遺不絕貴妃從葬景陵每時祀北望揮涕不已與人交不蓄中對賓客恂恂執謙如弟子雖貴富而服食儉素惟

好善樂施予不厭子孫滿前佳辰令節奉觴稱壽恒諄諄以盛腴為戒敏政嘗與鄉人造公公歎之竟日其貌溫醇其言簡而不誇有類乎古之仁人長者竊意其事福有自也翌等將以是歲十一月十五日奉葬順天府懷柔縣銀洞里賜地之原以敏政與公同鄉來請銘敏政聞徽之鎮曰黃山山之下在唐有黃茆者嘗刳股以愈母疾又廬父之墓以致連理木芝之祥見於史而爵位不聞豈天欲錫報於數百載之後而得公乎銘曰

黃山崇崇毓彼黃氏懿其前芳有唐孝子爰錫爾類繄  
天孔仁不食其報以啓後人猗神策公岷然中起嬪我  
仁廟維公之娣豈惟皇嬪慶迭斯臻妃我懷園維公之  
孫亦有公甥玉立在旁帝姬娟娟釐降於堂羌孰如公  
維齒祿位越顯孫子維德不匱奕奕几筵宸章莫之肅  
肅冠裳賜地寔之史臣刻銘置此宅旁中有耿光百世  
無數

公沒後一孫女復選為徽王妃孫男鏞亦選尚嘉  
祥公圭為駙馬都尉貴戚之盛蓋近世所未有也

贈文林郎浙江道監察御史汪公

宗煊

墓表

周洪謨

公諱宗煥字叔泰姓汪氏汪氏徽郡鉅姓皆祖唐忠武將軍越國公華華當隋末保有六州厯代奉以王爵而祀之華十二傳至唐兵馬使道安以兵鎮婺源家焉道安生漬唐季為三梧鎮將銀青光祿大夫檢校太子賓客兼殿中侍御史上柱國死於巢賊廟食三梧三梧之地曰大畈子孫又遷居之漬曾孫延貴延之延貴九傳至宋端明殿學士江淮制置使贈太傅立信以忠顯延



之曾孫紹與其子四友先生存竝以行義文學名其鄉  
存曾孫坻又自大畝遷浯溪公蓋浯溪之汪也坻五傳  
至南山先生德潤生二子曰叡同同當元季起義保州  
里厯官淮南行省左丞死於偽吳贈推誠效節輔國功  
臣榮祿大夫江浙行省平章政事追封平陽郡公叡仕  
國朝洪武中為承務郎左春坊左司直郎學者號貞一  
先生公會祖也祖淵父櫨皆隱居不仕伯父梁舉永樂  
甲申進士知虞城縣事簪紱蟬聯奕世不絕公生有至

性六歲喪母九歲喪父即哀慕如成人繼母江氏來歸甫一年即孀居以保節撫孤自誓而公亦能以亢宗為志然幼孱弱羣從父兄數侵之公曲志奉承不與之角恒自道其熒熒孑立之苦言與涕下聞者感動羣從父兄卒善視之貞一先生於六經諸史皆有著述公朝夕諷誦務究其旨義將以嗣其宦業而獨任家政不能出也公祖父兩世居鴻村鴻村者先壠在焉公以其地非便乃節縮浮費返於浯村舊址闢基考室視昔有加歲

時供祀必極豐腆哀感悽惻終身以不逮養為恨奉繼母如生已凡事務得其歡心見其子奎幼負才器方六歲即遣入縣庠奎果登名用成父志公為人剛介而襟度坦夷無綺言媚色汪氏自國朝來充萬石長公獨以取足官賦為事未嘗有所朘削里人賴之享年七十有二以成化戊戌十月十七日終於正寢配江氏邑蒲源人處士庸禮女也賢明慈惠克相夫子卒年六十有七奎以內臺考績獲賜勅贈公文林郎浙江道監察御史

江氏贈孺人公子男四長奎也成化丙戌進士除秀水知縣擢監察御史以抗疏論事出為夔州通判弘治初進叙州同知再進成都知府屢受旌異次坦次圻次坤女二長適江時英次適詹希昌孫男十二長銘次鐸次釗次欽次鏜次錫次鑛次鎧次鉤次鍍次鏐次鏡女九長適儒學生孫格次適滕梅次適江溥次適江杞皆邑之故家次適錦衣衛百戶休寧程壘故大司馬襄毅公之孫今學士克勤子也餘多未行公墓在大容梨樹坑

之原久未有表奎以克勤所序事行致書屬洪謨洪謨  
叙人也昔在春官見奎之納忠敢言嘗偉其人既歸里  
居又目擊其為郡惠民有古循良之風而無忝崇階峻  
秩不占可知則所以恢其顯揚之地發其幽潛之德將  
有進於此者是用述其家世履行之槩俾鑒諸石以俟  
他日之大書焉

新安文獻志卷九十二下